

დაუჯდომელი საგალობელი წმიდისა დიდისა მოწამისა და ძლევაშემოსილისა მოწამისა გიორგისი

კონდაკი 1

უგალობთ ღუაწლთა შენთა, მხნეო მოწამეო იესუსიო, და წმიდასა ხსენებასა შენსა ვადიდებთ, ხოლო რომელთა ესე მოვიღეთ შენ მიერ ხსნაი, გიხაროდენსა მადლობითა შევსწირავთ შენდა, ღმრთისანატრელო, და ვითარცა მსწრაფლ-შემწისა მიმართ სარწმუნოებითა მოლტოლვილნი და სიყუარულითა მოსრულნი, სახელოვანსა და ყოვლად დიდებულსა საკვირველებათა მიერ, მხურვალედ გიდა-ღადებთ: გიხაროდენ, ძლევაშემოსილო, დიდო მოწამეო გიორგი.

იკოსი 1

ჰბრწყინავ ნათლითა წამებისაითა, ქრისტეის მხედარო, მხნეო სულითა, და გვირგვინითა მარტვილთაითა შემკული ელვარედ მდგომარე ხარ წინაშე ღმრთისა, რომელსაცა ევედრე აწ ცხოვრებად და განათლებად ღირსად მგალობელთა სიწმიდისა შენისაითა, რაითა ყოველთა უწყოდინან, ვითარმედ სიკუდილისაცა შემდგომად ცხოველ-ხარ და წყალობასა მიჰმადლებ სარწმუნოებითა მხმოებელთა:

გიხაროდენ, საუნჯეოსულისა წმიდისაო;
გიხაროდენ, ჭურო კეთილისა ზნეობისა და გონიერებისაო;
გიხაროდენ, ტრფიალო ქრისტეის სიყუარულისაო;
გიხაროდენ, ზეცადმდე აღწევნულ სუეტო მართლისა სარწმუნოებისაო;
გიხაროდენ, ზღუდეო უბრძოლველო მამაცობისაო და გოდოლო შეუძრველო სიმხნისაო;
გიხაროდენ, სულითა წარჩინებულ გონიერო ანდამატო მოთმინებისაო;
გიხაროდენ, ას-წილად აღმარძინებულო შენდა მოცემულისა ტალანტისაო;
გიხაროდენ, უშურველო წყაროო წყლისა ცხოველისაო და ზღუაო კაცთმოყუარებისაო;
გიხაროდენ, კეთილმუშაკო ქრისტეის ვენახისაო;
გიხაროდენ, ურწმუნოთა მტერთა მიმართ სამღეველო დიდო მხედარო ქრისტეის ღმრთისაო;
გიხაროდენ, დიდებაო და ძლიერებაო მამულისა ჩუენისაო;
გიხაროდენ, უძლევლო წინამბრძოლო ქართველთა ერისაო და მფარველო ჩუენისა ეკლესიისაო;
გიხაროდენ, ძლევაშემოსილო, დიდო მოწამეო გიორგი.

კონდაკი 2

ნათელსა განეშორნეს და შეუდგეს ბნელსა უღმრთონი, რამეთუ განხდა ბრძანებაი ყოველსა სოფელსა, რაითა ღმერთსა ცხოველსა არაი მსახურებდეს, არამედ კერპთა უსულოთა, ხოლო შენ იხილე-რაი ეგოდენი უღმრთოებაი და ქრისტეის მბრძოლი გონებაი მათი, ღმრთისა სიყუარულითა მიეც მონაგები შენი გლახაკთა და თავი შენი მსხურებლად სათნოდ ქრისტესა, ამისთვისცა შუენიერსა სიკეთითა და წამებისა ბრწყინვალეებითა გიგალობთ და ვაქებთ სიმხნესა შენსა: ალილუია.

იკოსი 2

რაჟამს დაადგრა შენ თანა საღმრთოი სული საკვირველთმოქმედი, მინდობილი ღმერთსა ჭეშმარიტსა და მეუფესა ცათასა, არა შეძრწუნდი შენ ზარისგან უშჯულოისა მეფისა და არცა განმზადებულთა მათ სატანჯველთაგან, არამედ აღმსარებელი ქრისტეისი კადნიერად წარსდეგ წინაშე მზაკუვარისა კრებულისა

და ამხილე კერპთმსახურებაი, ეგრეთვე მოვედ ჩუენდა, სულითა უძლეველო, და მოგვეც გულისხმაი შეცოდებათა ჩუენტა, რაითა არა დაგვეხმას ბჰენი სასუფეველისანი შემსხმელთა შენთა:

- გიხაროდენ, მოწყალებითა და სარწმუნოებითა განწმედილო;
- გიხაროდენ, საღმრთოთა გულისხმის-ყოფითა განათლებულო;
- გიხაროდენ, სიმხნისა მამაცობისა ძლიერებითა გაბრწყინებულო;
- გიხაროდენ, კაპაადუკიასა აღმოცენებულო და პალესტინასა შინა კეთილად აღორძინებულო;
- გიხაროდენ, ბრძმედსა შინა მძაფრთა საღმობათასა გამოხურვებულო;
- გიხაროდენ, გუემითა დაბძარვისაითა და ტკვილითა მოღუაწებრითა განშუენებულო;
- გიხაროდენ, ღმრთის-მსახურებითა წამებისაითა გამოჩინებულო;
- გიხაროდენ, გლახაკთა ლოცვითა შეჭურვილო;
- გიხაროდენ, მარტვილობისა გვირგვინითა შემკულო;
- გიხაროდენ, ეკლესიისა ზღუდედ და მცველად წოდებულო;
- გიხაროდენ, ქართლოსიანთა მიერ სამართლად პატივისცემულო და მარადჟამს ხსენებულო;
- გიხაროდენ, უძლეველო წინამბრძოლო ქართველთა ერისაო და მფარველო ჩუენისა ეკლესიისაო;
- გიხაროდენ, ძლევაშემოსილო, დიდო მოწამეო გიორგი.

კონდაკი 3

უხილავთა და გამოუთქმელთა აღთქმულთა მათ საშუებელთა წინაისწარ მხედველ-იქმენ თუალითა სულისაითა, ღუაწლისა მძლეო, მხნეო მოწამეო, რომლისათვისცა არად შერაცხენ წარმავალნი საშუებელნი ამის საწუთროსანი, არამედ მსგავსად მხსნელისა შენისა ნებსით თვისით მიისწრაფდი ღუაწლთა მიმართ და დილეგსა შინა შეწყუდეული, ვითარცა საყდარსა მყოფი, სამ-წმიდა-არსობისა გალობითა უგალობდი დამზადებელსა ღმერთსა: ალილუია.

იკოსი 3

ვითარცა ვარდი სულნელი, ფერთა შუენიერთა გამოსჩნდი შენ ეკალთაგან უნაყოფოთა, და ვითარცა სანთელი, აღენტე შორის ბნელსა ნათესავთა მათ უგულისხმოთა, შუენიერო დიდებაო მოწამეთაო, და სძაგებდ განცხადებულად კერპთა მათ მტყუართა, ამისთვის აღემზადნეს მოკლვად შენდა, არამედ შენ ლოცვითა და სასოებითა ღმრთისაითა სული შენი განიმტკიცე და ხუეტანი და მრავალ-ფერნი სატანჯველნი ხრწნილთა ხორცთა ბუნებითა დაითმინე, რომლისათვისცა მორწმუნენი გხადით შენ მეოხად ღმრთისა მიმართ და ესრეთ გიღაღადებთ:

- გიხაროდენ, კეთილისა განზრახვისა გულსა შინა შენსა დამდებელო;
- გიხაროდენ, თვისტომთა შენთა შორის საღმრთოთა სწავლათა განმფენელო;
- გიხაროდენ, ღუაწლთა და განსაცდელთა ახოვნად თავს-მდებელო;
- გიხაროდენ, ქრისტისთვის ყუედრებისა და კიცხვისა დამთმენელო;
- გიხაროდენ, ტყუეობასა შინა სულისა აზნაურებისა დამმარხველო;
- გიხაროდენ, მანქანებათა მათ სიცრუვისაითა დამარღვეველო;
- გიხაროდენ, სულთა განმხრწნელთა სწავლებათა დამამხობელო;
- გიხაროდენ, სულიერისა მღვიმარებისა ზარისა დამარისხებელო;
- გიხაროდენ, სოფლისა ღელვათაგან შერყეულთა და შეგინებულთა გულთა დამამშვიდებელო;
- გიხაროდენ, ბოროტისა უკრძალველობისა და ურცხვინოებისაგან დამხსნელო;
- გიხაროდენ, მზაკუვარებისა დამლახვრელო და ეშმაკთა მსწრაფლ განმსხმელო;
- გიხაროდენ, უძლეველო წინამბრძოლო ქართველთა ერისაო და მფარველო ჩუენისა ეკლესიისაო;
- გიხაროდენ, ძლევაშემოსილო, დიდო მოწამეო გიორგი.

კონდაკი 4

არაი ინება მოქცევის სიბრძნისაგან და სიფიცხლისა მეფემან უგუნურმან, არამედ შენ ბრწყინვალისა და ძლიერისა ხმითა აღიარებდი ქრისტესა ღმერთად და კერპთა ეშმაკად სახელ-სდებდი და ყოველსა სიბრძნესა მას ამხილებდი, რომელნი ტყუილითა ღმერთად სწამებენ არაღმერთთა და ყოველთა ღმრთისა მიმართ მოუწოდდი და ადიდებდი ერთღმრთეებასა სამებით დიდებულსა, ბუნებით ერთსა და პირებით შეურწყმელსა: ალილუია.

იკოსი 4

ესმა-რაი სმენაი სიტყუათა შენთაი მძლავრთა, სირცხვილელ-იქმნეს ფრიად, რამეთუ ღმერთნი მათნი გინებულ-ჰყვენ და საცინელად გამოაჩინენ, ხოლო ქრისტე ღმერთი ჰქადაგე ხორციითა ჯუარცმული, უქმ-მყოფელი სულთა წარმწყმედელისა საცთურისა და მარადის ლოცვითა შეზღუდვილმან დაამხუე სილაღეი იგი მაცთურისა, რომლისათვისცა ერნი საქართველოსანი შეგასხამთ გალობასა ღირსსა:

- გიხაროდენ, სარწმუნოებითა მტკიცითა მძლავრთა უღმრთოებისა განმაქიქებელო;
- გიხაროდენ, მხილებისა მახვილითა ეშმაკისა მსახურთა განმგმერელო;
- გიხაროდენ, პატიოსნებისა და მამაცობისა დამნერგველო;
- გიხაროდენ, შეცთომილთა და დაბნელებულთა გზასა ჰქეშმარიტებისასა დამაყენებელო;
- გიხაროდენ, უძლურთა ძლიერებაო და მძლავრთა დამცემელო;
- გიხაროდენ, ცრუმორწმუნეობისა ბიწისა აღმხოცელო;
- გიხაროდენ, საკერპოთა ველურობისა კდნიერად დამხსნელო;
- გიხაროდენ, ჭირთა და ურვათა სახუმილისა დამშრეტელო;
- გიხაროდენ, განსაცდელთა და ღელვათა დამაყუდებელო;
- გიხაროდენ, სანთელო, გონიერთა განმანათლებელო და უგუნურთა დამწველო;
- გიხაროდენ, მუშაკთა ნაყოფიერმყოფელო და გლახაკთა გამომზრდელო;
- გიხაროდენ, უძლეველო წინამბრძოლო ქართველთა ერისაო და მფარველო ჩუენისა ეკლესიისაო;
- გიხაროდენ, ძლევამოსილო, დიდო მოწამეო გიორგი.

კონდაკი 5

დაეყუნეს ყურნი მეფესა განბოროტებულსა, მსგავსად ყრუსა ასპიტისა, რამეთუ არა ისმინა ხმაი შენი - კეთილად მეტყუელისა ბრძნისაი და ბრძანა ძელსა დამოკიდებაი შენი და ლახურითა განგმერაი, გარნა ღმერთმან საკვირველებათამან ცუდ-ყო განზრახვაი მისი და რაჟამს გიგმირეს, მეყუსეულად უკუნ-იქცა წუერი იგი ლახურისაი, ვითარცა ცვილისაი, ხოლო ხორცთა შენთა გამოეცა ცუარი სისხლისაი, ამისთვისცა კდნიერად აღიარე ძეი მამისა და სულისა თანა, და იგალობე ოსანაი ძლევისაი: ალილუია.

იკოსი 5

კვალად აღივსო დიოკლეტიანე გულისწყრომითა ფრიად და ბრძანა ფერხთა შენთა ხუნდსა შინა შეყრაი და მკერდსა ზედა ლოდისა დადებაი, ხოლო შენ, ახოვანო, მადლითა ხმითა მადლი და დიდებაი შესწირე ღმერთსა, რომელმან ღირს-გყო მკერდსა ზედა ტვირთვად მძიმისა ქვისა და გულსა შენსა შეურყეველად დამტკიცებაი მართლისა სარწმუნოებისა, რამეთუ ქრისტემან განგკურნა გუემათაგან და განგაძლიერა შენ, რაითა ყოველნი, რომელთა იხილეს საკვირველებაი დიდი, განმტკიცდეს და მადლობისა ხმითა დაუცხრომელად გნატრიდეს:

- გიხაროდენ, საღმრთოსა სჯულისა საცნაურად დამცველო;
- გიხაროდენ, მართლმადიდებლობისა სარწმუნოებისა ვაზისა დამნერგველო;
- გიხაროდენ, ზეცისა იერუსალიმისათვის ტანჯვათა დამთმენელო;
- გიხაროდენ, სასოებითა ღმრთისაითა მტერისა აღლესულისა საჭურველისა დამლენველო;
- გიხაროდენ, დაუცადებელითა ლოცვითა ეშმაკისა ცთუნებათა განმდევნელო და უღმრთოებისა სიმყრალისა

განმხდელი;
გიხაროდენ, ყრმათა ყოვლისა სიბილწისა და მანკიერებისაგან დამხსნელი;
გიხაროდენ, ქურივთა ნუგეშისმცემელი და ობოლთა გამომზრდელი;
გიხაროდენ, საპყრობილეთა და საკრველთაგან განმათავისუფლებელი;
გიხაროდენ, მწუხარეთა ნუგეშისმცემელი და ჭირთა მძვინვარეთა მსწრაფლ განმდევნელი;
გიხაროდენ, საღმობათა ჩუენთა განმაქარვებელი და ყოვლისა ქართველთ ზნეობისა ამამაღლებელი;
გიხაროდენ, სულთა ცოდვისა და ხორცთა სნეულებისა აღმხოცელი;
გიხაროდენ, უძლეველი წინამბრძოლო ქართველთა ერისაო და მფარველი ჩუენისა ეკლესიისაო;
გიხაროდენ, ძლევაშემოსილო, დიდო მოწამეო გიორგი.

კონდაკი 6

ფრიად მრავალთა მათ განსაცდელთა და საზარელთა სატანჯველთა, შეთხზულთა ღონითა მით ეშმაკისაითა ვერ დაგცეს შიში საზარი მოღუაწესა, რამეთუ ქრისტეისთვის ჰბრძოდი მათ და ანგელოზნი გფარვიდეს შენ, არამედ შიში და ზარი ბელიარსა დაეც და განაქარვე, ვითარცა ცვილი წინაშე ცეცხლსა, შემწველსა ქრისტეის წინააღმდეგობასა, რომლისათვისცა ანგელოზთა თანა მარადის უდაღდებდ ღმერთსა: ალილუია.

იკოსი 6

დაკუეთილნი რვალისა ჭურჭელთა მიერ ხორცნი შენნი და აღლესულითა დანიითა თვითეულად დაჭრილნი იხილენ-რაი სულითა განმხნობილმან, აღიხილენ თუაღნი ზეცად და ღაღად-ყავ: „მომხედენ მონასა შენსა, ღმერთო ჩემო, და შემეწიე, რაითა არა ვიძლიო ბოროტისაგან“, მაშინ მსწრაფლ გესმა ხმაი საწადელი დაუსაბამოისაგან: „გიორგი, მე მარადის შენთანა და შენ ჩემ თანა უკუნისამდე“, და კუალადცა განგაახლა, მისგანვე ითხოვე, სანატრელო, ერისა ჩუენისათვის ხსნაი ფლობისაგან უცხო თესლთასა და წყალობაი შენდამი მგალობელთა:

გიხაროდენ, ღმრთისმსახურებისა ღუაწლისა კეთილად მომმუშაკებელი;
გიხაროდენ, სასტიკებისა და სივერაგისა მომძულელებელი;
გიხაროდენ, განძვინებულისა ვეშაპისა კანდიერად მომწყველელი და მომწყუდელო;
გიხაროდენ, კაცთა მამულად სამსახურებელად და წესიერებად მომყვანებელი;
გიხაროდენ, ჭეშმარიტსა სარწმუნოებასა ზედა მრავალთა მომაქცეველი;
გიხაროდენ, ახოვნებითა მტერთა მძლეველი და ბოროტმადიდებელთა მარცხვენელი;
გიხაროდენ, მხედრობითისა ვაჟკაცობისა მასწავლელი;
გიხაროდენ, ყოველთა მხურვალედ მვედრებელთა შენთა მაცხოვნებელი;
გიხაროდენ, ღმრთისმოყუარეთა გულთა შინა მადლისმიერისა სიხარულისა მიმფენელი;
გიხაროდენ, ერთგულთათვის პატივისა მიმნიჭებელი და ორგულთა შემამრწუნებელი და დამამდაბლებელი;
გიხაროდენ, ღმრთისმეცნიერებისა ნათლითა კერპთმსახურთა წყუდიადისა განმანათლებელი;
გიხაროდენ, უძლეველი წინამბრძოლო ქართველთა ერისაო და მფარველი ჩუენისა ეკლესიისაო;
გიხაროდენ, ძლევაშემოსილო, დიდო მოწამეო გიორგი.

კონდაკი 7

ოდეს დაგმსჭუალეს შენ ურმისთვალსა მას საშინელსა, უშულონი ჰგონებდეს, რაითამცა მოგაკუდინეს, არამედ კუალადცა განიკურნე მოსლვითა ანგელოზისა ღმრთისაითა და განახლებული და ბრწყინვალეი წარსდეგ წინაშე მეფისა და მაგნეტიოსისა, მეგობრისა მისისა და მრთლად გამოჩინებითა მრავალნი მიიტაცნე სარწმუნოებად ჭეშმარიტისა ღმრთისა, რომელთაცა მახვილითა აღსასრული მიი-თუალეს და იხარებენ და გალობენ წინაშე ღმრთისა: ალილუია.

იკოსი 7

შემძრწუნდა უგულისხმოი იგი მეფეი და დასი მისი, რამეთუ დამდოვრდეს სატანჯველნი იგი მათნი არა ვნებად შენდა და ლიქნითა იწყეს სიტყუად შენდა მომართ: „გიორგი, აწ გუერჩდი ჩუენ და გადიდოთ შენ“, ხოლო შენ ამხილებდი ცთომილებასა მათსა და ეტყოდი: „დიდებაი თქუენი თქუენდავე იყავნ, წარსაწყმედელად თქუენდა უღმრთონო“, და ძროხის ძარღვითა უწყალოდ გუემული აკურთხევდი ღმერთსა, რომელსაცა ევედრე აწ, დაცვად განსაცდე-ლთაგან ბოროტთა შენდამი მგალობელთა:

გიხაროდენ, ჯუარისა ქრისტეისისა მხართა შენთა ზედა აღმღებელო;
გიხაროდენ, მსგავსად დავითისა უცხო-თესლთა დამცემელო;
გიხაროდენ, ყოვლისა კეთილისა და ღმრთივ-სათნოსისა დამწერგველო;
გიხაროდენ, ძმათ-უყუარულთა და ანგარ-მომხვეჭელთა მამხილებე-ლო და ძლიერად დამთრგუნველო;
გიხაროდენ, მოყუასთა შემაერთებელო და მტერთა დამლახვრელო;
გიხაროდენ, ღმრთისმებრძოლთა სილაღისა დამამხობელო;
გიხაროდენ, ცოდვათა ჩუენთა საკრველთაგან დამხსნელო;
გიხაროდენ, სინანულისა ძლით შეცოდებულთა ლოცვად აღმძრველო;
გიხაროდენ, მხოლოო მართლმადიდებელთა მხედართა მრავალ-გზის თანამბრძოლო და მფარველო;
გიხაროდენ, მედროვეთა და მზაკუვართა მარცხვენელო;
გიხაროდენ, სარწმუნოებითა მგალობელთა მაკურთხეველო;
გიხაროდენ, უძლეველო წინამბრძოლო ქართველთა ერისაო და მფარველო ჩუენისა ეკლესიისაო;
გიხაროდენ, ძლევაშემოსილო, დიდო მოწამეო გიორგი.

კონდაკი 8

ვითარცა ელისე ელიას ხალენითა მსწრაფლ განაპობდა მდინარესა, ეგრევე ჯუართა განაპე ურწმუნოებისა სიმძლავრეთა მდინარენი, რომელსა შინა განვლეს მრავალთა ერთა, რამეთუ არა მხოლოო ცოცხალი ოდენ და სულიერი, არამედ ყოვლითურთ უვნებელი გიხილეს, ახალ-დამბალსა კირსა შინა, ცეცხლისა სახედ მოტყინარესა და განკვირვებულთა ხმა-ყვეს: „ჭემმარიტად დიდ არს ღმე-რთი ქრისტეანეთა“, ხოლო შენ, მსგავსად ყრმათა მათ სახუმილსა შეთხეული არა განილიენ, მოწამეო, არამედ შეიცურიენ და წადიერად უგალობდი ზეცათა მეუფესა: ალილუია.

იკოსი 8

უბრძანა მეფემან უგუნურმან ფრიად განხურვებაი ხამლთა რკინისაითა, განმსჭუალულთა სამსჭუალეებითა და შესხმად ფერხთა შენთა პატიოსანთა, რომელ ილოცევდ: „ყვენ ესე მხსნელ ფერხთა ჩემთა, სანთელ აღნთებულ და გზა მორბედებისა ჩემისა შენდა მომართ“, ხოლო ანგელოზნი მხიარულ იქმნეს კეთილთა მათ მოღუაწებათათვის შენთა და განგკურნეს ყოველთაგან სატანჯველთა, ამისთვისცა ხელაღპყრობით მლოცველნი შეუვრდებით პატიოსანსა ხატსა შენსა და ქებულებათა შენთა მიუთხრობთ ყოველთა:

გიხაროდენ, ცხოვარო პირმეტყუელო ქრისტეის წმიდისა სამწყსოსისაო;
გიხაროდენ, აღმსარებელო დევნილისა სარწმუნოებისაო;
გიხაროდენ, მესაიდუმლეო ღმრთის მხილველობისაო;
გიხაროდენ, მაგალითო საღმრთოსისა მხედრობისაო;
გიხაროდენ, მხნედ განმბასრველო კაცთა ხელოვანებითა შეთხზულისა შჯულისაო;
გიხაროდენ, აღმაორძინებელო დაცემულისა ქრისტეანულისა სულისაო;
გიხაროდენ, შემმუსრველო ბოროტად მადიდებელთა კადნიერებისაო;
გიხაროდენ, გზაო უცდომელისა ცხოვრებისაო;
გიხაროდენ, ცოდვისა ზღუასა შინა დანთქმულთათვის ნავთსაყუდელო ხსნისაო;
გიხაროდენ, დამაცხრობელო ცოდვათა ჩუენთა წყლულებისაო;
გიხაროდენ, ძლიერო შურისმგებელო ქართველთა მტერისაო;
გიხაროდენ, უძლეველო წინამბრძოლო ქართველთა ერისაო და მფარველო ჩუენისა ეკლესიისაო;

გიხაროდენ, ძლევაშემოსილო, დიდო მოწამეო გიორგი.

კონდაკი 9

შენ მიერ აჩუნა ღმერთმან უღმრთოთა მათ საკვირველი სასწაული, და ლოცვითა შენითა აღადგინა საფლავით მკუდარი დაძულებული და ურწმუნოებითა დამინებული კერპთმსახურებასა შინა, რომელი გმადლობდა, ვითარცა ღუაწლისა-მძლესა, უარისყოფითა შეაჩვენებდა კერპთა უსულოთა, და ხმა-მადლად აღიარებდა ქრისტესა ღმერთად, ხოლო ათანასე გრძნებასა ზედა განთქმული, მცის მოიქცა, ძლიერებითა ღმრთისაითა უქმ-იქმნა-რაი გრძნებათა მისთა ხელოვნებაი და გვირგვინოსანმყოფელსა შენსა იესუს შესწირა სამადლობელი გალობაი: ალილუია.

იკოსი 9

ჯუარითა შემუსრე-რაი კერპნი მცბიერნი წინამძღუარმან დიდმან მორწმუნეთამან, აღევხნა ნეტარი დედოფალი საღმრთოთა შურითა და მსწრაფლ დაუტევა სადედოფლოი იგი თვისი, და განეშორა-რაი დიოკლეტიანეს - ვეშაპსა მას ჯოჯოხეთისასა, მოწაფესა ეშმაკისასა, ხმა-ყო: „ესე უწყოდით ამიერთგან, მე ვარ მხევალი ქრისტეისი, რომელსა ქადაგებს წმიდაი გიორგი“, და მცის რწმენა ქრისტე დიდსა სიმრავლესა ერისასა, ამისთვისცა განვიცდით მხურვალესა ღმრთისმოყუარებასა შენსა და მოგართმევთ საგალობელსა ამას ქებისასა:

- გიხაროდენ, ხარსა ზედა ქმნულითა სასწაულითა ყოვლად ნეტარისა ღლუკერისა ღმრთისა მომაქცეველო;
- გიხაროდენ, ალექსანდრია დედოფლისა ჭეშმარიტებისა გზასა ზედა დამაყენებელო;
- გიხაროდენ, ანატოლე და პროტოლეონ სტრატილატთა ღუაწლთა შენთა თანა შემრაცხველო;
- გიხაროდენ, სასწაულთა მიერ კერპთმსახურთა შემაშფოთებელო;
- გიხაროდენ, მათ მიერ ზარგანხდილთა ქრისტეისმოყუარეთა ერთა სულიერთა სიხარულითა აღმავსებელო;
- გიხაროდენ, მოგვთა გრძნებისა და მცბიერებისა დამარღვეველო;
- გიხაროდენ, გრძნულთა და მისანთა უგულისხმოებისა და ბილწთა ზახებისა დამმრეტელო;
- გიხაროდენ, ეშმაკთა საზორველისა ძალითა ქრისტეისითა დამამხოზელო;
- გიხაროდენ, სატანისა მახეთაგან და უცხო თესლთა ზედა მოსღვისაგან დამცველო;
- გიხაროდენ, ცოდვისა ბიწთა სულისა ჩუენისაგან განმხდელო;
- გიხაროდენ, განწირულთა სიკუდილისაგან გამომხსნელო;
- გიხაროდენ, უძლეველო წინამბრძოლო ქართველთა ერისაო და მფარველო ჩუენისა ეკლესიისაო;
- გიხაროდენ, ძლევაშემოსილო, დიდო მოწამეო გიორგი.

კონდაკი 10

განცვიბრდა დიოკლეტიანეი და რისხვითა მიუთხრობელითა აღივსო, რამეთუ ხედვიდა სარწმუნოებისა წარმატებასა და კერპთა უსულოთა დამდაბლებასა, თუ-ვითარ საპყრობილედ მოყვანებულნი მრავალნი უძლურნი შენ მიერ საკვირველსა კურნებასა მიემთხვეოდეს, ხოლო ურიცხვი ერი და სიმრავლეი მხედართაი ნიშთა მიერ საკვირველთა ახოვან-ქმნილნი სულითა განმტკიცნებოდეს და ყოვლად ძლიერსა ღმერთსა ცხადად და საცნაურად ადიდებდეს: ალილუია.

იკოსი 10

დაელინეს ღონენი იგი სატანჯველთანი უწყალოსა მას მეფესა, რამეთუ ხედვიდეს სასწაულთა - არაი გკუეთდა ლახუარი, არცა ცეცხლი შეგწუვიდა და არცა ზარ-გცემდა შიში სიკუდილისაი და ჰრქუა ერსა თვისსა: „აჰა ესერა, ვერარაი ვავნეთ ჩუენ ტანჯვითა განდგომილსა მას, არამედ აცთუნა სხუანიცა მრავალნი“, და მსგავსად სამსხურპლოისა ზუარაკისა განაჩინა შენი დაკლვაი, რომელიცა სიხარულითა მიითუალე და წარსდეგი წინაშე ღმრთისა, და აწ მრჩობლ-გვირგვინითა შემკული მფარველ ხარ ყოველთა, შენდა

შევედრებულთა და მხურვალედ მგალობელთა:

- გიხაროდენ, მოციქულებრივ მქადაგებელო მართლისა სარწმუნოებისაო;
- გიხაროდენ, განმაქარვებელო ყოვლისა ურწმუნოებისაო;
- გიხაროდენ, ფარო დამცველო კეთილმსახურებისაო;
- გიხაროდენ, მახვილო განმკუეეთელო ბოროტმსახურებისაო;
- გიხაროდენ, ტკბილად მზიდველო საღმრთოისა უღლისაო;
- გიხაროდენ, მომგებელო ძლევისა გვირგვინისაო;
- გიხაროდენ, ოქროო, ცეცხლისა მიერ გამობრძმედილო და მიძღვნილო უკუდავისა სიძისაო;
- გიხაროდენ, მურო, ნელსაცხებელად შეწირულო უკუდავისა მეუფისაო;
- გიხაროდენ, გუნდრუკო, აღკმეულო საღმრთოისა მის საკურთხეველისაო;
- გიხაროდენ, ცეცხლო, დამწველო გულსა შინა ჩუენსა ყოვლისა ღუარძლისაო და კუროისთავისაო;
- გიხაროდენ, უმუსრველო ძეგლო ქრისტეანობისაო;
- გიხაროდენ, უძლეველო წინამბრძოლო ქართველთა ერისაო და მფარველო ჩუენისა ეკლესიისაო;
- გიხაროდენ, ძლევაშემოსილო, დიდო მოწამეო გიორგი.

კონდაკი 11

კრავთაებრ არა უხმობდი შენ და არცა ღაღადებდი დაკლვად-რაი ხვიდოდი, არამედ სულ-თქმით ილოცევდი ღმრთისა მიმართ და წამებისა შენისა მომხსენებელთა ხსნასა ყოვლისაგან ჭირისა და განსაცდელისა კანდიერად ითხოვდი, ხოლო რაჟამს გამოგიჩნდა ღრუბლით-გამო უფალი და აღვითქვა თხოვისა შენისა კეთილად აღსრულებადი, სიხარულითა წარუჰყარ ქედი შენი მახვილსა და შეეყავ გზასა მას წმიდათასა, და მიერთგან სასწაულთა მარადის აღმოუცენებ წმიდათა ნაწილთა შენთა თაყუანისმცემელთა და მგალობელთა წინაშე ყოვლად ბრწყინვალისა ხატისა შენისათა: ალილუია.

იკოსი 11

სიყუარულსა ქრისტეს ღმრთისასა ვერარამან განგაშორნა, პატიოსანო მარტვილო, - ვერცა ტანჯვამან და ვერცა აღთქმულმან დიდებამან, არამედ სიმხნითა ყოველთა ერეოდი და განითქვი სახელოვნად ყოველთა ცისკიდეთა, რამეთუ დაუტევე ეკლესიათა ღმრთისათა წამებისა შენისა თანა, სწავლაი და სახსენებელი შენი პატიოსანი, რომლისა აღმასრულებელნი გულსმოდგინედ მოვისწრაფვით ტაძარსა შენსა შუენიერსა და სამკვალესა ბრწყინვალესა, რაითა არა ვიქმეთ საყუედრელ და საცინელ მტერთა ჩუენთა, არამედ სიყუარულითა ღმრთისა და მამულისათა ერთ ზრახვად შეკრულნი გნატრიდეთ შენ, მარტვილო დიდებულო, ჭეშმარიტად საქებელსა:

- გიხაროდენ, ზუარაკო წმიდაო და უბიწო, ქრისტეისთვის სისხლისა დამთხვეველო;
- გიხაროდენ, მხეცთა ზახებისა დამადუმებელო და დამცემელო;
- გიხაროდენ, სარწმუნოებისაგან განდრეკილთა და უსჯულოებისა მომქმედთა ერის მთავართა და წინამძღოლთა დამამხოველო;

გიხაროდენ,

- ამპარტავნებითა აღზევებულთა დამამდაბლებელო; გიხაროდენ, ბრძენთა და კეთილად მხედველთა ამამაღლებელო;
- გიხაროდენ, სიღრმესა უღმრთოებისასა დანთქმულთა სულთა ღმრთისა შესამეცნებელად აღმომქუმელო;
- გიხაროდენ, ტყვეობისაგან და მძლავრთა მონებისაგან მრავალთა სულთა გამომხსნელო;
- გიხაროდენ, საღმრთოითა ღუაწლითა შენითა უხორცოთა წესთა განმაკვირვებელო;
- გიხაროდენ, ერისა ჩუენისა სულიერად განმაბრწყინვებელო;
- გიხაროდენ, ძილსა შინა მცველო და მღვიძარებასა შინა განმანათლებელო;
- გიხაროდენ, არა-ცხოველისა და ნელტფილისა სარწმუნოებისა ჩუენისა განმაცხოველებელო;
- გიხაროდენ, უძლეველო წინამბრძოლო ქართველთა ერისაო და მფარველო ჩუენისა ეკლესიისაო;
- გიხაროდენ, ძლევაშემოსილო, დიდო მოწამეო გიორგი.

კონდაკი 12

მართლმადიდებლობისა სარწმუნოებითა მოწყულმან, ვითარცა ამხილენ კერპთმსახურებისა სიციბილსა, ეგრეთვე დაგვიფარენ მართლმადიდებელნი ერნი მწვალებელთა შესაკრებელისაგან, რომელ არს მორვეი სიბილწისაი, ხოლო მტერი იგი მომსრველი მორწმუნეთა ქართველთაი დაამხუე და დასთრგუნე ერსა ჩუენსა ზედა აღმრული საიდუმლოი იგი უშჯულოებისაი, რაითა სიწრფოებითა გუ-ლისაითა ვიდოდეთ მამულ-ჰაპურსა გზასა ზედა და კურთხეულითა ენითა ქართულითა გაქებდეთ შენ, ვითარცა უძლეველსა მოწამესა და მხედარსა ძლიერსა: ალილუია.

იკოსი 12

დიდისა მეუფისა მხნეო მხედარო გიორგი, გუაკურთხენ და გვიძვიდე ჩუენ სლვად გზასა მას მცნებათასა, რაითა კაცნი ცრუნი და ურწმუნონი, რომელნიცა ჰგომბენ ჰეშმარიტსა ღმერთსა და აქუთ თაყუანის -საცემელად და სალოცველად თვისად მამონაი, არასადა ღირს იქმნენ მთავრობად ერსა ჩუენსა ზედა და მიტაცებად მართლმადიდებელთა ქართველთა, არამედ განგვიმრავლდეს ყოვლისა ქართველთ ზნეობითა სრულ-ყოფილნი ერის-მძღუარნი, რაითა ზრუნვიდეს ერისა ჩუენისათვის და ხმითა მადლობისაითა ჰნატრიდეს სიმხნეთა შენთა:

გიხაროდენ, ღმრთისა მიერ შენდა მონიჭებულთა მადლითა საკვირველთმოქმედო;
გიხაროდენ, ვარსკულავო, ხსნისა მეძიებელთათვის გზისა მაჩუენებელო;
გიხაროდენ, ცოდვისა მოყუარეთა კაცთათვის თავშეკავებისა სიტკბოებისა მასწავლელო;
გიხაროდენ, საუფლოსა ერისა მზაკუვარებითა განმხრწნელთა დამლახურელო; გიხაროდენ, სიმართლისა მოძულეთა და ბოროტისა კეთილად დამდებთა მარცხვენელო; გიხაროდენ, აღბორგებულთა ღმრთისმომულეთა მძლეველო;
გიხაროდენ, ნებელობითა თვისითა სჯულის მდებელთა მათ, მრავალთა შემაცთუნებელთა, შემრისხველო;
გიხაროდენ, ქუადქმნილთა და ფიცხელთა გულთა მომალობელო;
გიხაროდენ, ყრმობრივისა ბორგნეულებისა და უკრძალველობისა მომძულეებელო;
გიხაროდენ, კეთილმორწმუნეთა მთავრობათა და მხედრობათა მაკურთხეველო;
გიხაროდენ, საღმრთოითა ძალითა სნეულთათვის სიმრთელისა მბოძებელო;
გიხაროდენ, უძლეველო წინამბრძოლო ქართველთა ერისაო და მფარველო ჩუენისა ეკლესიისაო;
გიხაროდენ, ძლევაშემოსილო, დიდო მოწამეო გიორგი.

კონდაკი 13

ჰოი, გვირგვინოსანო მარტვილო, და ანგელოზთა თანა-ზიარო დიდო მოწამეო გიორგი, რომელი განანათლებ სულთა შიშითა და ღმობიერად მვედრებელთა სიწმიდისა შენისაითა და საკრველისაგან იხსნი შენითა ღმრთისა მიმართ სათნოითა ლოცვითა, შეიწირე აწ კნინი ესე სამადლობელი გალობაი და, ვითარ იგი აღგვითქუ ჟამსა აღსრულებისა შენისასა, ეგრეცა გვიხსენ, წმიდაო, ყოვლისა ბოროტისაგან და მტერისა საფრხეთაგან, და სიხარულსა საუკუნოსა ღირს გვყვენ შენდამი მგალობელნი: ალილუია.

ეს კონდაკი 3-გზის